



An Bhruiséil, 14 Feabhra 2023
(OR. en)

6375/23

FISC 29
ECOFIN 143

TORADH NA nIMEACHTAÍ

ó:	Ardrúnaíocht na Comhairle
chuig:	Coiste na mBuanionadaithe/an Chomhairle
Uimh. an doic. roimhe seo:	6121/23 FISC 24 ECOFIN 128 + COR 1 + COR 2
Ábhar:	Conclúidí ón gComhairle maidir le liosta athbhreithnithe an Aontais de dhlínsí neamh-chomhoibríocha chun críoch cánach

Gheobhaidh na toscaireachtaí, san Iarscríbhinn a ghabhann leis seo, na conclúidí ón gComhairle maidir le liosta athbhreithnithe an Aontais de dhlínsí neamh- chomhoibríocha chun críoch cánach, a d'fhormheas an Chomhairle Ecofin ag an gcrúinniú a bhí aici an 14 Feabhra 2023.

Conclúidí ón gComhairle

maidir le liosta athbhreithnithe an Aontais de dhlínsí neamh-chomhoibríocha chun críoch cánach

Maidir le Comhairle an Aontais Eorpaigh,

1. CUIREANN SÍ I dTREIS a thábhachtaí atá sé caighdeáin dea-rialachais chánach, lena n-áirítear i réimse an chánachais chothrom agus na trédhearcachta cánach agus chomhrac na calaoise cánach, na n-imghabhála cánach agus na seachanta cánach a chur chun cinn agus a neartú, ar leibhéal an Aontais agus ar fud an domhain araon;
2. TUIGEANN SÍ an comhar táirgthe leanúnach i ndáil le cúrsaí cánach idir an Mheitheal um an gCód Iompair maidir le Cánachas Gnó ('an Mheitheal um an gCód Iompair') agus formhór na ndlínsí ar fud an domhain;
3. IS DÍOL SÁSAIMH DI an dul chun cinn atá déanta sna dlínsí ábhartha trí bhíthin na gcéimeanna gníomhacha a tugadh faoi na spriocdhátaí a comhaontaíodh agus na gealltanais nua a tugadh le go réiteofar na heasnamh a shainaithin an Mheitheal um an gCód Iompair;
4. IS DÍOL SÁSAIMH DI an nuashonrú ar chritéar 1.1 maidir le huathmalartú faisnéise faoi chuntais airgeadais agus na gealltanais a thug na dlínsí atá i mbun idirphlé leis an Meitheal um an gCód Iompair faoi chuimsiú an nuashonraithe sin; IS OTH LÉI gur theip ar roinnt dlínsí gealltanais a thabhairt don Mheitheal laistigh den spriocdháta a leagadh síos, rud a d'fhág gur áiríodh iad ar liosta an Aontais de dhlínsí neamh-chomhoibríocha chun críoch cánach, nó gur íosghrádaigh an Fóram Domhanda iad i ndáil lena rátáil maidir le malartú faisnéise arna iarraidh sin;

5. IS OTH LÉI go bhfuil roinnt dlínsí fós nach gcomhoibríonn chun críoch cánach agus gur theip ar roinnt dlínsí a ngealltanais i leith na Meithle um an gCód Iompair a chomhlíonadh i ndáil le ceanglais maidir le substaintí eacnamaíocha faoi chritéar 2.2 nó maidir leis an athchóiriú ar chórais chánach dhíobhálacha faoi chritéar 2.1; IARRANN SÍ ar na dlínsí sin oibriú leis an Meitheal um an gCód Iompair chun na saincheisteanna atá fós ann a réiteach;
6. FORMHEASANN SÍ an measúnú a rinne an Mheitheal um an gCód Iompair ar chóras leasaithe na gcuideachtaí sealbhaíochta idirnáisiúnta de chuid Chónaidhm na Rúise i bhfianaise chritéir theicniúla an Chóid Iompair maidir le cánachas gnó i gcomhthéacs liosta an Aontais, go háirithe an measúnú ar an gcaoi a ndéileáiltear le hioncam ó mhaoín intleachtúil agus ar na forálacha marthanachta agus MEASANN SÍ nár chomhlíon Chónaidhm na Rúise a gealltanais a córas cánach fabhrach díobhálach a leasú agus, dá bhrí sin, gur cheart í a áireamh ar liosta an Aontais de dhlínsí neamh-chomhoibríocha chun críoch cánach; CUIREANN SÍ I bhFÍOS GO LÁIDIR go gcuireann an fogha míleata gan chúis atá á thabhairt ag an Rúis faoin Úcráin, ar ionsaí é a cháin an Chomhairle Eorpach go láidir arís is arís eile¹, cosc ar an Meitheal um an gCód Iompair idirphlé a choinneáil ar bun le húdarais na Rúise;
7. IS OTH LÉI nach bhfuil aon dul chun cinn déanta ag an Tuirc le Ballstát amháin maidir le huathmhalartú faisnéise éifeachtach; IARRANN SÍ AN ATHUAIR ar an Tuirc tús a chur leis gcaidreamh maidir le huathmhalartú faisnéise le Ballstát amháin atá fós gan réiteach agus na ceanglais a leagtar amach i gconclúidí ó Chomhairle Ecofin an 22 Feabhra 2021, an 5 Deireadh Fómhair 2021, an 24 Feabhra 2022 agus an 4 Deireadh Fómhair 2022 a chomhlíonadh ina n-iomláine; ATHDHEARBHAÍONN SÍ gur coinníoll é uathmhalartú éifeachtach faisnéise leis na Ballstáit uile chun go mbeidh critéar 1.1 de liosta an Aontais á chomhlíonadh ag an Tuirc; IARRANN SÍ ar an Meitheal an Chomhairle a chur ar an eolas maidir lena bhfuil ag titim amach i ndáil leis sin agus leanúint d'aghaidh a thabhairt ar na saincheisteanna atá fós gan réiteach i gcás nach bhfuil aon dul chun cinn déanta;

(1) ¹ EUCO 18/22, EUCO 1/22, 21/22, 31/22. 34/22, chomh maith le 9873/22.

8. FORMHEASANN SÍ an Tuarascáil ón Meitheal um an gCód Iompair a leagtar amach in 5922/23;
 9. FORMHEASANN SÍ dá réir sin liosta athbhreithnithe an Aontais de dhlínsí neamh-chomhoibríocha chun críoch cánach ('liosta an Aontais') a leagtar amach in Iarscríbhinn I;
 10. FORMHUINÍONN SÍ staid na himeartha mar a leagtar amach in Iarscríbhinn II í i ndáil le gealltanais a thug dlínsí comhoibríocha chun caighdeáin dea-rialachais chánach a chur chun feidhme.
-

Liosta an Aontais de dhlínsí neamh-chomhoibríocha chun críoch cánach**1. Samó Mheiriceá**

Ní chuireann Samó Mheiriceá aon uathmhalartú faisnéise airgeadais i bhfeidhm, níor shínigh sé ná níor dhaingnigh sé, lena n-áirítear tríd an dlínse a bhfuil siad ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, níl gealltanais tugtha aige na híoschaighdeáin maidir le creimeadh an bhoinn agus aistriú brabúis (íoschaighdeáin BEPS) a chur i bhfeidhm ná níl gealltanais tugtha aige go dtabharfaí aghaidh ar na saincheisteanna sin.

2. Angaile

Éascaíonn Angaile struchtúir agus socruithe amach ón gcósta atá dírithe ar bhrabúis a mhealladh gan fíorshubstaint eacnamaíoch ós rud é nach ndéanann sé gach gníomhaíocht is gá chun cur chun feidhme éifeachtach na gceanglas maidir le substaintí faoi chritéar 2.2 a áirithiú.

Tá Angaile ag fanacht le hathbhreithniú forlíontach ag an bhFóram Domhanda maidir le Trédhearcacht agus Malartú Faisnéise chun críoch Cánach ('Fóram Domhanda') i ndáil le malartú faisnéise arna iarraidh sin (critéar 1.2).

3. Na Bahámaí

Éascaíonn na Bahámaí struchtúir agus socruithe amach ón gcósta atá dírithe ar bhrabúis a mhealladh gan fíorshubstaint eacnamaíoch ós rud é nach ndéanann sé gach gníomhaíocht is gá chun cur chun feidhme éifeachtach na gceanglas maidir le substaintí faoi chritéar 2.2 a áirithiú.

4. Ógh-Oileáin na Breataine

Níl rátáil ‘mórchomhlíontach’ ar a laghad ag Ógh-Oileáin na Breataine ón bhFóram Domhanda i ndáil le malartú faisnéise arna iarraidh sin.

5. Cósta Ríce

Tá córas díolúine díobhálach maidir le hioncaim ó fhoinsí eachtracha ag Cósta Ríce agus níl an tsaincheist sin réitithe go fóill aige.

Tá gealltanas tugtha ag Cósta Ríce aghaidh a thabhairt ar mholtaí an Fhóraitm Dhomhanda maidir le huathmalartú faisnéise (critéar 1.1) in am trátha, chun go mbainfear amach an rátáil ‘i bhfeidhm, ach feabhas ag teastáil’ ar a laghad maidir le príomhcheanglais 1 agus 2 i dtuarascáil athbhreithnithe piaraí an Fhóraitm Dhomhanda i bhfómhar 2024.

6. Fidsí

Ní comhalta í Fidsí den Fhóram Domhanda, níor shínigh sí ná níor dhaingnigh sí an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha aici (cuideachtaí onnmhairiúcháin, dreasacht na dteicneolaíochtaí cumarsáide ioncaim, ráta lamhálaís cánach do cheanncheathrú réigiúnach nó domhanda), níl sí ina comhalta den Chreat Cuimsitheach ná níor chuir sí íoschaighdeán BEPS i bhfeidhm agus níl na saincheisteanna sin réitithe go fóill aici.

7. Guam

Ní chuireann Guam aon uathmhalartú faisnéise airgeadais i bhfeidhm, níor shínigh sé ná níor dhaingnigh sé, lena n-áirítear tríd an dlínse a bhfuil sé ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, níor gheall sé íoschaighdeán BEPS a chur i bhfeidhm ná níor gheall sé go dtabharfaí aghaidh ar na saincheisteanna sin.

8. Oileáin Marshall

Éascaíonn Oileáin Marshall struchtúir agus socruithe amach ón gcósta atá dírithe ar bhrabúis a mhealladh gan fíorshubstaint eacnamaíoch ós rud é nach ndéanann sé gach gníomhaíocht is gá chun cur chun feidhme éifeachtach na gceanglas maidir le substaintí faoi chritéar 2.2 a áirithiú.

9. Oileáin Palau

Ní chuireann Oileáin Palau aon uathmhalartú faisnéise airgeadais i bhfeidhm, níor shínigh siad ná níor dhaingnigh siad an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, agus níl na saincheisteanna sin réitithe go fóill acu.

10. Panama

Níl rátáil ‘mórchomhlíontach’ ar a laghad ag Panama ón bhFóram Domhanda i ndáil le faisnéis a mhalartú arna iarraidh sin, tá córas díolúine díobhálach maidir le hioncaim ó fhoinsí eachtracha aige, agus níl na saincheisteanna sin réitithe go fóill aige.

Tá gealltanais tugtha ag Panama aghaidh a thabhairt ar mholtaí an Chreata Chuimsithigh i ndáil le cur chun feidhme chritéar 3.2 maidir le tuairisciú de réir tíre (CbCR), in am trátha, ionas go léireofar é sin i dtuarascáil athbhreithnithe piaraí ar Ghníomhaíocht 13 an Chreata Chuimsithigh i bhfómhar 2023.

11. Cónaidhm na Rúise

Tá córas cánach fabhrach díobhálach ag Cónaidhm na Rúise (cuideachtaí sealbhaíochta idirnáisiúnta) agus níl an tsaincheist sin réitithe go fóill aige.

12. Samó

Tá córas cánach fabhrach díobhálach ag Samó (gnó eischósta) agus níl an tsaincheist sin réitithe go fóill aige.

13. Oileán na Tríonóide agus Tobága

Ní chuireann Oileán na Tríonóide agus Tobága aon uathmhalartú faisnéise airgeadais i bhfeidhm, níl rátáil ‘mórchomhlíontach’ ar a laghad acu ón bhFóram Domhanda i ndáil le faisnéis a mhalartú arna iarraidh sin, níor shínigh siad ná níor dhaingnigh siad an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha acu (criosanna saothrádála), agus níl na saincheisteanna sin réitithe go fóill acu.

Gheall Oileán na Tríonóide agus Tobága aghaidh a thabhairt ar mholtaí an Chreata Cuimsitheach i ndáil le cur chun feidhme chritéar 3.2 maidir le tuairisciú de réir tíre (CbCR), in am trátha, ionas go léireofar é sin i dtuarascáil athbhreithnithe piaraí ar Ghníomhaíocht 13 an Chreata Cuimsitheach i bhfómhar 2023.

Tá gealltanais tugtha ag Oileán na Tríonóide agus Tobága freisin aghaidh a thabhairt ar mholtaí an Fhóraitm Dhomhanda maidir le huathmalartú faisnéise (critéar 1.1) in am trátha, chun go mbainfear amach rátáil “i bhfeidhm, ach feabhas ag teastáil”, ar a laghad, i gcás phríomhcheanglais 1 agus 2 i dtuarascáil athbhreithnithe piaraí an Fhóraitm Dhomhanda i bhfómhar 2024.

14. Oileáin na dTurcach agus na gCaiceos

Éascaíonn Oileáin na dTurcach agus na gCaiceos struchtúir agus socruithe amach ón gcósta atá dírithe ar bhrabúis a mhealladh gan fíorshubstaint eacnamaíoch ós rud é nach ndéanann sé gach gníomhaíocht is gá chun cur chun feidhme éifeachtach na gceanglas maidir le substaintí faoi chritéar 2.2 a áirithiú.

15. Ógh-Oileáin na Stát Aontaithe

Ní chuireann Ógh-Oileáin na Stát Aontaithe aon uathmhalartú faisnéise airgeadais i bhfeidhm, níor shínigh siad ná níor dhaingnigh siad, lena n-áirítear tríd an dlínse a bhfuil siad ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha acu (clár forbartha eacnamaíche, cuideachtaí díolmhaithe, gníomh rialála ionaid baincéireachta idirnáisiúnta), níl gealltanais tugtha siad íoschaighdeáin BEPS a chur i bhfeidhm ná níl gealltanais tugtha acu go dtabharfaí aghaidh ar na saincheisteanna sin.

16. Vanuatú

Éascaíonn Vanuatú struchtúir agus socruithe amach ón gcósta arb é is aidhm dóibh brabúis nach bhfuil aon fhíorshubstaint eacnamaíoch ag baint leo a mhealladh, agus níl an tsaincheist sin réitithe go fóill aige.

Tá Vanuatú ag fanacht le hathbhreithniú forlíontach ag an bhFóram Domhanda maidir le malartú faisnéise arna iarraidh sin.

**Staid na himeartha maidir leis an gcomhar leis an Aontas i ndáil le gealltanais a thug dlínsí
comhoibríocha chun prionsabail an dea-rialachais cánach a chur chun feidhme**

1. Trédhearcacht

1.1 Uathmhalartú faisnéise

Meastar go ndéanfaidh an dlínse seo a leanas faisnéis a mhalartú go huathoibríoch leis na 27 mBallstát uile de réir na hamlíne dá dtagraítear i mír 6 de Chonclúidí ón gComhairle an 22 Feabhra 2021, mír 4 de Chonclúidí ón gComhairle an 5 Deireadh Fómhair 2021, agus mír 4 de Chonclúidí ón gComhairle an 24 Feabhra 2022 agus mír 4 de Chonclúidí ón gComhairle an 4 Deireadh Fómhair 2022.

An Tuirc

Thug na dlínsí seo a leanas gealltanais aghaidh a thabhairt ar mholtaí an Fhóraitm Dhomhanda maidir le huathmalartú faisnéise in am trátha, chun go mbainfear amach an rátáil ‘i bhfeidhm, ach feabhas ag teastáil’ ar a laghad maidir le príomhcheanglais 1 agus 2 i dtuarascáil athbhreithnithe piaraí an Fhóraitm Dhomhanda i bhfómhar 2024.

Arúba, an Bheilís, Cúrasó agus Iosrael

1.2 Comhaltas san Fhóram Domhanda agus rátáil shásúil i ndáil le malartú faisnéise arna iarraidh sin

Tá na dlínsí seo a leanas ag fanacht ar athbhreithniú forlíontach ón bhFóram Domhanda:

An Bhotsuáin, Doiminice agus na Séiséil

2. Cánachas Cothrom

2.1 Córais chánach dhíobhálacha atá ann

Maidir leis an dlínse seo a leanas, a thug gealltanais a córas díobhálach maidir le díolúine ioncaim ó fhoinsí eachtracha a leasú nó a dhíothú faoi dheireadh 2022, bhí srianta uirthi maidir le hathchóiriú bunreachtúil agus léirigh sí go ndearnadh dul chun cinn nithiúil in 2022 agus tugadh cead di, go dtí an 31 Márta 2023, a reachtaíocht a mhéid a bhaineann le rialacha frith-mhí-úsáide agus na ceanglais maidir le substaintí eacnamaíocha a oiriúnú. Gheall an dlínse sin an reachtaíocht leasaithe a chur i bhfeidhm le héifeacht ón 1 Eanáir 2023:

Catar

Maidir leis na dlínsí seo a leanas, a thug gealltanais a gcórais díolúine dhíobhálacha maidir le hioncaim ó fhoinsí eachtracha a leasú nó a dhíothú faoi dheireadh 2022, agus a léirigh go ndearnadh dul chun cinn nithiúil ar na hathchóirithe sin in 2022, tugadh cead dóibh, go dtí deireadh 2023, a reachtaíocht maidir leis an gcaoi a ndéileáiltear le gnóthachain chaipitiúla a oiriúnú:

Hong Cong agus an Mhalaeisia

Maidir leis na dlínsí seo a leanas, a thug gealltanais córas cánach fabhrach a leasú agus a dhíothú faoi raon feidhme an Fhórait maidir le Cleachtais Chánach Dhíobhálacha faoin 31 Nollaig 2022, tugadh cead dóibh go dtí deireadh mhí Aibreáin 2023 a reachtaíocht a oiriúnú:

An Iordáin (crios eacnamaíoch speisialta Aqaba)

Thug na dlínsí seo a leanas gealltanais a gcórais chánach fhabhracha dhíobhálacha a leasú nó a dhíothú faoi raon feidhme an Fhórait maidir le Cleachtais Chánach Dhíobhálacha faoin 31 Nollaig 2023:

An Albáin (dreasaigh tionsclaíocha), an Airméin (limistéir eacnamaíocha saor in aisce agus tionscadail teicneolaíochta faisnéise) agus Eswatini (crios eacnamaíoch speisialta)

3. Creimeadh an bhoinn agus aistriú brabúis a chosc

3.2 *Cur chur chun feidhme íoschaighdeán CbCR (Gníomhaíocht 13 an Chreata Chuimsithigh um BEPS)*

Gheall na dlínsí seo a leanas íoschaighdeán CbCR a chur chun feidhme trí aghaidh a thabhairt ar mholtaí an Chreata Chuimsithigh in am trátha, ionas go léireofar é sin i dtuarascáil athbhreithnithe piaraí ar Gníomhaíocht 13 an Chreata Chuimsithigh i bhfómhar 2023 agus/nó caidreamh malartaithe maidir le CbCR le Ballstáit uile an Aontais a ghníomhachtú de réir an spriocdháta a comhaontaíodh:

An Bheilís, Iosrael, Montsarat, an Téalainn, Vítneam
